

Rapport dalla seduta dil cussegl da vischnaunca dils 18 da november 2025 en casa da scola a Dardin

Presenza:

- 13 commembers dil cussegl
- 2 suppleants senza dretg da votar
- 3 commembers dalla cumissiun da quen e gestiun
- 4 commembers dalla suprastanza communal + actuar

Hosps: 3 ulteriurs hosps

La presidenta dil cussegl, Andrea Cathomas fa a tuts presents in cordial beinvegni alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Damai ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 22 da matg 2025

Il protocol ei vegnius tarmess allas cusseglieras ed a tuts cussegliers. La presidenta dil cussegl suttametta el alla discussiun. Da tala vegn buca fatg diever. Il protocol vegn approbaus unanim e senza cuntervuschs.

2. Preventiv e quen d'investiziun 2026

Il preventiv ei vegnius tarmess tier a tuts cussegliers per informaziun. Tal siara suenter expensas da frs. 16'393'500 ed entradas da frs. 16'456'915 cun in surpli entradas ell'altezia da frs. 63'415. Quei preventiv ha saviu vegnir fatgs tenor il quen annual 2024 sco referenza. Il quen d'investiziun preveda expensas da frs. 5'190'000 ed entradas da frs. 650'000. Las investiziuns netto muntan per consequenza a frs. 4'540'000

Il president communal repassa il preventiv dil quen current sco era dil quen d'investiziun e dat sclariments tier tut las posiziuns. Sin las damondas tschentadas sa vegnir dau risposta per cuntentientscha dils presents. Propostas per midadas vegn fatg neginas. Il cussegl approbescha entras tscharna unanima (13:0) e senza cuntervuschs il preventiv cun quen d'investiziun 2026 per mauns dalla radunonza communal. Cun quella approbaziun ein era ils credits necessaris tenor il quen d'investiziun concedi.

Il president communal presenta aunc il plan da finanzas (investiziuns) per ils proxims 4 onns (2026 – 2029). Quei plan ei in instrument da lavur per la suprastanza e sto buca vegnir approbaus dil cussegl. Ils cussegliers han priu enconuschientscha dil plan, il qual vegn era presentaus alla radunonza communal.

3. Pei da taglia 2026

Mintg'onnn han il cussegl da vischnaunca e la radunonza communal la pusseivladad da fixar il pei da taglia.

La suprastanza fa la proposta da schar il pei da taglia sco tochen dacheu sin 90% dalla taglia cantunala semplia.

La taglia sin schischom sto tenor lescha da taglia vegnir fixada mintg'onnn da niev. Quella importa denter 1.5 entochen 2.0 promils. La suprastanza fa la proposta da restar sco tochen dacheu sin sin 1.7 promils.

Las damondas vegnan sutta messas alla discussiun. Era la cumissiun da quen e gestiun sustegn la proposta dalla suprastanza. Autras propostas vegn fatg neginas. Cun tscherna unanima (13:0) decida il cussegl per mauns dalla radunonza communal da fixar il pei da taglia ordinari sco tochen dacheu sin 90 % dalla taglia cantunala semplia ed il pei da taglia sin schischom sin 1.7 promils.

4. Elecziun commembra cumissiun scola

Patric Maissen da Breil ei sedecidiu da seretrer dalla cumissiun scola per immediat. Per la successiun vegn fatg la proposta sin Milena Arpagaus da Breil.

Autras propostas vegn buca fatg. Aschia elegia il cussegl Milena Arpagaus da Breil cun tscherna unanima sco nova commembra dalla cumissiun scola naven dad immediat.

5. V a r i a

Clau Schlosser informescha il cussegl sur dalla decisiun dil Tribunal federal en connex cun la via da colligiazion e declara ils proxims pass. Sco proxim ei previu la publicaziun dil project. Per quei intent ha ei dau in inscunter ensemen cun nies giurist ed igl inschignier per sclarir ils detagls e per buca far sbagls formals tier la publicaziun.

Il cusseglier Luzi Pfister engrazia alla suprastanza communal e principalmein al president communal per siu nunstuncienteivel engaschi en connex cun la via da colligiazion.

Quei ei stau la davosa seduta dil cussegl en la perioda d'uffeci 2022 - 2025. Era ei quei stau la davosa seduta dil cussegl per il president communal Clau Schlosser, dils geraus Roman Cathomas e Maurus Tomaschett sco era digl actuar Curdin Cadonau. Il president dalla cumissiun da quen e gestiun engrazia als partents cun menziunar ils merets duront biars onns en favur dalla vischnaunca. La presidenta menziunescha aunc il termin dalla radunonza communal che ha liug venderdis ils 28 da november 2025 dallas 20.15 uras a Breil. Ella giavischa allas cusseglieras ed als cussegliers in bien retuorn a casa e siara la seduta dallas 20:45 uras.

Breil, ils 19 da november 2025

La presidenta

Andrea Cathomas-Friberg

Igl actuar

Curdin Cadonau